

January 2011

Kristian Tlangau



(Independent Monthly)

Chhuah ŋan kum - Oct. 1911

| | |
|-----------------------------------|----|
| Dam chhung ni chhiar dan | 21 |
| Synod Inkhawmpui Thlirletna | 26 |

January 2011

Kristian Tlangau

2

Kum 100

January 2011

Bu 1180-na

| | | |
|-------------------------|--|------------------|
| Editor | : Rev. Thangzauva | Ph. :2316411 (R) |
| Joint Editors | : Rev. Lalzuithanga Rev. Dr. Vanlalchhuanawma Upa H. Ronghaka | |
| Business Manager | : Upa C. Lalbiakluanga Synod Press Building chung Synod Compound, Mission Veng Aizawl – 796 001 | |
| Office Phone | : 2324590 | |
| e-mail | : kristiantlangau@yahoo.co.in | Fax : 2324590 |

Kum khat lak man : Rs. 50.00

A man pe leh a bu la duh chuan Business Manager, Synod Press Building, Aizawl hriattir tur.


Kristian Tlangaua thu chhuahte hi Editor ngaihdaan a ni vek kher lo.

A CHHUNGA THU AWMTE

| | phêk |
|---|------|
| 1. Editorial | 3 |
| 2. Mizoram Synod | 4 |
| 3. Lawrkhawm | 12 |
| 4. Zawnha leh Chhâna | 15 |
| 5. Sermon: 1) Dam chhung ni chhiar dan | 21 |
| 6. Synod Inkhawmpui Thlirletna | 26 |
| 7. Sûnna | 32 |

Synod Puipate

| | |
|------------------|--|
| Moderator | : Rev. C. Lalsangliana |
| Secretaries | : Rev. P.C. Pachhunga (Sr.) Upa DP. Biakkhuma (Jr.) |
| Finance Officers | : Rev. Dr. Lalmangaiha Rev. Zosangliana Colney |
| Statistician | : Rev. C. Sangliana |



HE KUMTHAR HI

Kristian Tlangau chhiartu zawng zawngte Editorial Board-in kum thar chibai kan bŭk a che u. Mi thenkhatin kum 2000 lo thleng tur kha 'Computer-in a hmu tawh lo' tiin an enghelhin an buaipui hle a nih kha. Mahse, hun neitu Pathian chuan a lo vawng tha khiau va, chumi hnuah pawh kum 10 lai kan lo hmang liam leh ta a nih hi. Kum thar (2011) kan lo chuang kai leh ta reng mai! Min hruai thlengtu Pathian hnenah lawmthu i sawi ang u.

Kum hlui a liam a, he kum thar hian kan chungah eng nge a rawn thlen dawn tuman kan sawi lâwk thei lo; vanneihna emaw, vanduaina zawk emaw pawh a ni thei. Thil chi hrang hrang kan chungah rawn thlentü - hun leh kumte hi Pathian ta, a kuta awm a nih avangin a neitu hnena inkawltîr hi mihringte hian kan tih mâkmawh a ni.

Khawvêla mihring lo piang zawng zawngte hi a-tu-a-mah, a lian a t̄ein hun nei t̄em b̄ik emaw, hun nei tam b̄ik emaw tumah kan awm lo; hun kan neih z̄at a inang tl̄ang vek. Hun hmang t̄angkai leh hmang thiam an lawm a, hmang tha lo leh t̄angkai lo an lawm lo va, hman that loh avanga inchhir lahin awmzia a nei na hek lo.

Pathian leh mi dangte tâna hun hmang tha leh t̄angkaite an lawm thin a, t̄ang leh thar lo awm zel turte tâna thil tha hnutchhiah a, Lalpa tana seng khawm tam te hlei hlei an lawmna a s̄ang ang. Kum 2011 chh̄ung hian thil tha eng emaw pakhat tal hnutchhiah tum ila, chu chuan tute emaw hnenah malsawmna a thlen hun a awm ngei ang. Dam chh̄ung ni chhiar dan tha chu - Pathian leh kan mihring puite tana thil tha kan tih hi a ni. Chutiang tak chuan he kum thar hi hman i tum ang u.7



*- Executive Secretary
i/c Publicity, etc.*

1. Family Guidance & Counselling Centre

Nov. 17 zan khan Synod Moderator Rev. C. Chawnglian Family Guidance & Counselling Centre buatsaih Pastor-te puala Intensive Residential Pastoral Care & Counselling Training wawi 20-na, Synod Multipurpose Training Centre (SMTC), Mission Vengthlanga neih chu a hawng. Training hian Dec. 1 (Nilaini) thleng a aw h a ni.

Tun tumah hian Pastor 19 an tel thei a, Resource person-te chu Rev. Zothansanga, Rev. C. Sangliana, Rev. Lalrinmawia, Rev. J. Vanlalnuna leh Dr. C. Lalhrekima te an ni.

Kum 1991 atang khan Pastor-te pualin Counselling Training hi buatsaih thin a ni a, Pastor 325 training pek tawh an ni. Kum 2002 atang khan Lay Leader-te pualin Pastoral Care

& Counselling Training hi buatsaih thin a ni baw k a, tum 13 buatsaih tawhah Lay Leader 249 hnenah Training Certificate pek an ni tawh baw k.

2. Synod Literature & Publication Board (SL&PB)

November 19-21 khan Zokhawthar Kohhranah Literature Seminar neih a ni a, seminar neihpui hian Rev. Thangzauva, Editor; SL&PB, Upa C. Lalbiaktluanga, Business Manager; Pi Rinsailovi, Asst. Editor leh Pi Rallianthangi, Office Assistant te an kal.

3. Social Front

◆ November 19 khan Kolasib khaw pum huapin Land Reforms Seminar neih a ni a, seminar hi Rev. Lalzuihanga, Executive Secretary; Dr. Robert S. Halliday, Coordinator; Pu J. Malsawma, O/A; Upa Zaneihltluanga leh Upa R.K. Thanga ten an neihpui a ni.

◆ November 26-28 khan Phullen Vengthar Kohhranah Social Front Awareness Campaign neih a ni a, Pu John Lalhrualtuanga, Social Front Asst. Coordinator leh Upa B. Lalrinsanga te an kal.

◆ December 5 chawhnu khan Tleirawl Inkhawm, Khatla

Kohhranah Drugs & Sex Awareness Campaign neih a ni a, Dr. Robert S. Halliday, Social Front Co-ordinator-in hun a hmanpui a ni.

4. Kohhran Hmeichhia

◆ November 16–21 khan Presbyterian Church of Taiwan-te rawtna angin Presbyterian Church of Taiwan, Paiwan Presbyterian Womens' Dept. leh Mizoram Presbyterian Kohhran Hmeichhiaten rawngbawlna kawnga intlawh tawn leh inzir tawn (Exchange programme) an hman a, Taiwan-a kan missionary thawk lai Rev. Zaidarhzauva nupui Pi Sapvengi hovin mi 7 (Rev. Tsai/Ailien, Rev. Tjuku. Kasupeljan, Rev. Kao/Tienhui, Rev. Tjuwu. Vatjesan, Pro. Pastor Remeran. Tjausunuk, Pro. Pastor Chen/Enhui, Hsu/Hsiuying, B.D.)-te an lo kal a ni. Taiwan mikhualte hi Tourist Lodge, Chaltlangah thlentir an ni a, Central Kohhran Hmeichhe Committee-ten an lo buaipui a ni.

Taiwan mikhualte hi Synod hmun pawimawh hrang hrangte tlawhpui an nih bakah Aizawl chhunga Kohhran thenkhatah inkhawmpuiin, Naupang Sunday School-te tlawhpui an ni bawk. Central Kohhran Hmeichhe

hruaitute nen inkawmhona hun neiin Synod Moderator-in Davids' Kitchen, Chanmari-ah Dinner a buatsaihsak a. Nov. 20 khan One Day Meeting programme, Pi Zaii Hall-ah an hman a, Nov. 22 khan Aizawl an chhuahsan leh a ni.

◆ Nov. 26 kha **Kohhran Hmeichhe Ni** a ni a, kumin hian Buhfaitham Centenary (1910–2010) denchhenin Pi Zomuani, Hmeichhe Inkhawmpui Lian Chairman ziak 'Buhfaitham rawngbawlna chanchin' zir ho a ni. Kohhran Hmeichhiate chuan hemi ni pual hian hun hlimawm tak an hman hlawm. Kohhran Hmeichhe Ni hi kum 1997 atangin hman tan a ni a, kumin hi vawi 14 an hmanna a ni ta.

Kohhran Hmeichhe Ni hmanpui hian Central Kohhran Hmeichhe Committee atangin Chhingchhip Mualpui Kohhranah Pi Lalhmelthai, Pi Kamliani leh Pi Salvationthangi te an kal a, Nov. 27 & 28 khan Sihhmui Kohhranah Kohhran Hmeichhe Ni Follow-up programme hmanpuiin Pi C. Lalbiakdiki, Pi C. Lianpari leh Pi Vanlalmuani te an kal bawk.

◆ Dec. 4 & 5 khan Serchhip Bial huapin Serchhip Kawnpui

Kohhranah Leadership Training & Kristian Chhungkaw Campaign neih a ni a, training neihpui hian Central Kohhran Hmeichhe hruaitu Pi Lalthansangi Fanai, Pi Lalsawmtluangi leh Pi Lalhlmpuii te an kal.

5. Synod Mission Board

- ◆ Nov. 14 khan Moregaon, Assam Mission Field-ah ringthar pasarihin baptisma an chang thar.

- ◆ November 18 khan Upa R. Lalmalsawma, SMB Co-ordinator chuan lāngin Home Mission North hnuaiā Saihapui 'K', Chhimluang leh Meidum te tlawh kual.

- ◆ Ramthar Board Executive Committee chuan kum 2008-a Missionary Pre-Service Training zo, mi 22-te chu interview a neihpui hnuah January 15, 2011 aṭangin Synod Mission Board hnuaiā thawktu nghet atan a la thar a, January 15, 2011 hmain an awmna theuh Field kal tlangin Synod Mission Board Headquarters-ah joining report pe tura hriattir an ni.

- ◆ Nov. 24 & 25 khan **Central India Mission Field Consultation**, New Delhi-ah neih a ni a, Synod Mission Board Secretary Rev. Lalchuanmawia

leh Rev. Z.D. Lalhmachhuana, BEC member-te an kal. Consultation-ah hian Siliguri, Kolkata, Patna, Jharkhand, Lucknow, Delhi leh Nepal Mission Filed aṭangin Field Secretary, Pastor zawng zawng leh Mission Filed tin aiawh missionary pathum zel an tel.

- ◆ Nov. 24 & 25 khan Home Mission North hnuaiā Salem Boarding School Master Plan siam turin Upa R. Lalmalsawma, SMB Coordinator; Upa H. Ngurkhuma, Mission Promoter; Upa B. Lalrinliana, BEC Member leh Pu Thangliankhuma, Asst. Engineer-te an kal.

- ◆ Nov. 30 khan Mission Development Training Centre (MDTC), Bualpui North chuan Graduation Day wawi 24-na an hmang a. Khuallian atana ruat Rev. Lalzuithanga, E/S i/c SMB a theih loh avangin a aiah Upa R. Lalmalsawma, Synod Mission Board Coordinator a kal thung. Tualchung leh Bial hruaitute bakah Kolasib District Agriculture Officer-in Graduation Day hi an rawn hmanpui bawk a ni.

Graduation Day-ah hian hlawhtling taka Course zo mi 11

an awm a, Agriculture & Horticulture - 4, Carpentry - 5, Ranvulh - 2 te an ni. Training beitung hi Assam, Arunachal West, Karbi Anglong Field & Cachar Tlangram leh Home Mission North lama mite an ni a, training zingah hian missionary thawk lai bakah a ram mi an awm nual bawk.

Mission Development Training Centre (MDTC) hi kum 1993 vela sawrkarin Synod hnena a pek a ni a. CRPF ram luah thin chu tangkai taka hman a nih theih nan Kohhran kutah hian hlan a ni. A tirah chuan Mission Outreach Training Institute (MOTI) tiin bul tan a ni a, hun eng emaw chen hnuah Mission Development Training Centre (MDTC) tiin tuna hma lakna chi hrang hrang hmang hian training hi koh a ni ta a ni.

- ♦ Synod Mission Board (SMB) chuan Contract Missionary thawk lai eng emaw zat thawk chhonzawm turin a rel a, mi 56 a la thar bawk.

- ♦ Nov. 26 & 27 khan Asarenda, Lucknow Bialah Crusade hlawhtling tak neih a ni a, mi 61-in baptisma an chang thar. Kumin chhung hian Lucknow Mission Field huam

chhungah ringthar 1,039 lai an awm belh tawh a ni.

6. MSSU

November 15–17 khan 4/14 Windows Pre-Summit Consultation, Patna-ah neih a ni a, Pu Lalthahluna Ralte, MSSU Asst. Coordinator leh Upa K. Zoremsanga, MSSU Trainer-te an kal. Pu Lalthahluna Ralte leh Upa K. Zoremsanga te hian Nov. 18–21 khan Patna Mission Field-ah hian Sunday School Training an neihpui nghal a, Nov. 24–28 khan Dimapur, Kohima-ah Sunday School Training an rawn neihpui leh bawk.

7. Mizoram Kohhran Hruaitute Committee

Nov. 22 khan Mizoram Kohhran Hruaitute Committee Executive Committee, Synod Office Committee Room-ah an thukhawm a, kum 2011-a Remna Ni hman dan tur an rel.

MKHC Exe. Committee chuan nakkum 2011, June 30 (Remna Ni champha) hi kum sawmhni pangana (Silver Jubilee) a lo nih tak avangin lawm ngei ni se, tiin an rel a. India sawrkar leh MNF-te Inremna a lo awm theih nana Kohhran hruaitute hmalakna a Bu-a siam relin kum 2011 Remna Ni-ah hian

chhuah hman ngei tura buatsaih ni se an ti. He lehkhabu ziak tur hian mi pali inruat nghalin Editor leh a khaikhawmtu atan Rev Vanlaluata ruat a ni.

Mizoram pumah Kohhran pawl hrang hranga Tualchung Kohhran tinten lawmthu sawi tawngtaina an hman theuh theih dan tur programme an siam bakah Vanapa Hall-ah MKHC Hqrs.-in programme hautak lutuk lo siam tumin programme kimchang buatsaih tur Sub-Committee an din nghal a ni. MKHC meeting hian Independent Church of India (ICI) Kohhranin member nih an dilna an ngaihtuah nghal a, General Meeting-a ngaihtuah turin an chhawp a ni.

8. Chatuan chawlhnaah

Chhiahtlang Pastor Bial hnuaiia Pro. Pastor hna thawk lai, Pro. Pastor V. Lalmuanpuia chu Nov. 20 zan dar 10:00 khan Christian Medical College, Vellore-ah Thisen Cancer-in a thi. Nov. 23 khan Zemabawk North Kohhran Biak Inah Synod Moderator Rev. C. Chawnglian a vui a. Upa Vanlalhuma, Synod Secretary-in a chanchin sawiin Rev. Lalzuithanga, Exe. Secretary-in tawngtaina hun a hmang a, Chhiahtlang Bial

Zaipawl leh Zemabawk North Kohhran Zaipawlten hla an rem bawk.

9. Assam Rifles' Kohhran Diamond Jubilee

November 24 khan Synod Moderator Rev. C. Chawnglian chuan Assam Rifles' Kohhran kum 60 tlin (Diamond Jubilee) lawmna hmanpuiin Jubilee lungphun a hawng. Golden Jubilee lawmna Inkhawmah hian Brig. S.K. Verma, Commandant, 10th Assam Rifles chuan Souvenir a tlangzarh nghal a. Inkhawm banah Jubilee hriatrengna lunphun Synod Moderator chuan hawng a ni.

10. Music

♦ Nov. 23 & 24 khan Tuidam Kohhranah Solfa Training neih a ni a, Pu H. Lalrinmawia, Music Instructor leh Tv. K. Lallawmkima, Upper Republic ten an neihpui.

♦ Nov. 29 (Thawhtanni)-a Music Elementary Course Examination Result chu November 30 khan tih chhuah a ni a, results khaikhawmna hetiang a ni-

| | |
|-----------------------------------|----|
| Honours (Mark 80% chunglam) : | 4 |
| Exam zawng zawng zat : | 32 |
| First Division (Mark 70% – 79%) : | 6 |
| Pass zawng zawng zat : | 29 |

Second Division (Mark 60% – 69%): 9
 Supplement: 2
 Pass Division (Mark 45% – 59%): 10
 Fail: 1

11. 37th Capping & Lamp Lighting

Nov. 25 khan Presbyterian Hospital chuan kumina Nurse zir tharte lukhum khumtirna leh thutiamtirna, Capping & Lamp Lighting Ceremony wawi 37-na, Nursing School Auditorium-ah an hmang a, khuallian Rev. C. Chawnglian Merit Prizes 2010 a sem a, fuihna thuchah a sawi nghal bawk.

12. Synod Exe. Committee wawi 231 & 232-na

Synod Exe. Committee wawi 231-na chu Dec. 1 khan Pi Zaii Hall, Synod Conference Centre-ah an thukhawm a, SEC 232-na (Budget Session) chu December 2 khan an thu bawk.

SEC Meeting hi Synod Moderator Rev. C. Chawnglian kaihruaiin hunserh a hmang a, hming lamna neih zawhah Synod Secretary report ngaihtlak a ni.

Tun tum SEC rorelnaah hian member 135 zinga 119 an tel thei a, thu ngaihtuah tur chhawpchuah (agenda) 17 an nei a. An thu ngaihtuah zingah,

Synod Social Front buatsaih-**Media-in a tha lo zawnga kan nun a kaihruai dan zirchianna** a tel a, SEC chuan he zir chianna hi tha a ti a, Synod Inkhawmpuia ngaihtuah zui atan a dah a ni. Kohhran Hmeichhe Inkhawmpui Lian Chairman tang lai mek Pi Zomuan chu a pasal Rev. Dr. Roger Gaikwad, National Council of Churches in India (NCCI), Nagpur-a General Secretary hna thawk tura tih a nih avangin a aiawh ruat a ngai a. Vice Chairman tang lai mek Pi Lalneihkimi chu Kohhran Hmeichhe Inkhawmpui Lian (Feb. 2011) thlenga Chairman nihna lo chelh tura ruat a ni. Kohhran Hmeichhe Inkhawmpui Lian Chairman thar tur chu February, 2011 SEC-ah ngaihtuah a ni ang. Aizawl Theological College (ATC) Principal, Rev. Dr. Roger Gaikwad-a hmun ruak luah turin Vice Principal tang lai mek Rev. Dr. Vanlalchhuanawma thlan a ni a, Dec. 2 atanga Principal nihna hi chelh tan tura rel a ni.

SEC meeting wawi 232-na, thukhawm chuan kum 2010–2011 kum kal meka Synod Pastoral leh Ramthar sum indaih loh dil belhna (Additional Budget) enhovin kum 2011–2012 sum

ruahmanna (Budget Estimate) an thlir ho nghal a. Additional Budget-ah hian **Pastoral-ah ₹ 4,09,20,580** leh **Mission-ah ₹ 1,512,9,320** hman an remti a. Kum thar (2011–2012) Synod pumpui budget: Pastoral-ah ₹ 64,78,42,300 Mission-ah ₹ 37,36,56,700 avaiin ₹ 1,02,14,99,000 chu Synod Inkhawmpui-a pharh turin an pawm bawk a ni.

13. Bible Sunday

Dec. 5 kha Bible Sunday a ni a, Bible Society of India (BSI) zawmtu Kohhran hrang hrangten hemi pual hian programme an hman. Presbyterian Kohhran chuan Inkhawm tum khat atan programme duangin chawhnu emaw zan inkhawmah emaw, Kohhrante remchan angin hman a ni. Kumin Bible Sunday thupui atan hian **'Bible Pathian duh zawng hriattirtu'** (Sam 119:97-105; II Tim. 3:14-17; Heb. 4:12) hman a ni. Inkhawm thawhlawm hi Bible Society rawngbawlina atan hman tur a ni a, Bible Society Collector-te hnenah theh luh a ni.

14. Kristian Thalai Pawl

♦ Central KṛP Committee-in Synod Choir kum 25-na (Silver Jubilee) tlin lawmna neih tura a

rel chu Synod Executive Committee (SEC)-ah thlenin SEC 230:55-nain a din hun hi zir chian deuh ngaiin a hria a, Research & Evaluation Wing kutah dah a ni.

Hetianga Synod Choir din tan hun tih chian tur a nih rih tak avang hian Silver Jubilee lawm tuma ruahmanna lo siam tawh chu a remchang ta lo va, hming dang vuahin **'Mizoram Synod Choir - Through the Ages'** tiin thlak a ni ta a. Nov. 25 khan Electric Veng Kohhran Hall-ah Synod Choir member lo ni tawh zawng zawngte pual programme hlimawm tak buatsaih a ni a, Synod Choir member lo ni tawh mi 153 an tel thei a, CKṬP hruaitu leh Synod Puipate nen an vaiin mi 180 lai an kalkhawm a ni.

Programme hi Session thumah then a ni a, Session I-ah Upa Lalrinmuana, CKṬP Gen. Secy hnen atangin SEC tuchhuak sawifiahna ngaihtlak a ni a, Session II-ah Fellowship leh Rehearsal neih a ni a, Session III-ah Synod Choir member-te hi Group-ah inthenin hla an rem a, Video Shooting neih nghal a ni bawk. Heta an zai hi a duh apiang tan tlawmtea lei theih turin tihchhuah thuai a ni ang.

♦ **Christmas Carol Service & Open Air Christmas Concert**

KTP General Conference, 2010 thurel 'Krismas leh Kum thar vuakvet thianghlim zawka hman dan inzirtir ni se' tih bawhzuina pakhat atan Nov. 5 zan khan Chaltlang Kohhran Hall-ah Christmas Carol Service neih a ni a, zaithiam lar tak tak mi 23-te nen hun hlimawm tak an hmang. Christmas Carol Service programme hi Video CD-a siam a ni a, a duh apiang tan CKTP Office-ah a thlawnin copy/write theih reng a ni.

Krismas leh Kum thar vuakvet thianghlim zawka hman dan inzirtir chungchang bawhzuina kal zelah Dec. 14 & 16 zanah Aizawl khawpui chhung hmun 4-ah Open Air Christmas Concert buatsaih leh a ni a, Dec. 14 zanah a thawh khatna atan Dawrpui (Millennium Centre kawt) leh Bawngkawnah neih a ni a, Dawrpuih hian CKTP Leader Rev. K. Lalpiangtharan thuchah a sawi a, Bawngkawnah T/Upa Dr. C. Zarzoliana, CKTP Asst. Secretary hnen aʔangin thuchah ngaihthlak a ni baw.

Dec. 16 zanah a thawh hnihna atan Mission Veng leh Vaivakawnah neih leh a ni a, Mission Vengah hian CKTP Asst. Leader Pu Zohminglian thuchah a sawi a, Vaivakawnah Pu Vanlalfinga, CKTP Finance Secretary-in a sawi baw.

15. Moderator Programme

Synod Moderator Rev. C. Chawngliana chuan hetiang hian hun a hmang:

November 19 (Zirtawpni)

ATC College Day Function

November 20 (Pathianni)

Chawhma - Mualkhang Kohhran (Sairang Bial)

Chawhnu - Nazareth Kohhran (Kawnpui Bial)

November 28 (Pathianni)

Chawhma - Centenary Kohhran (Venghnuai Bial)

Chawhnu - Dawrpui Kohhran (Dawrpui Bial)

Zan - Dawrpui Vengthar (Dawrpui Vengthar Bial)

December 5 (Pathianni)

Chawhnu - Hmangaihna In, Durtlang

December 7-12

Synod Inkhawmpui, Zarkawt





Damdawi hnawla ṭawngṭai damna thlangtuten thubuai an awrh

America ram Pennsylvania state-a cheng Herbert Schaible te nupa chuan an fapa kum hnih mi, pneumonia natna vei chu damdawia enkawl aia ṭawngṭaina aṭanga rinna damna an beiseipui a, damdawi hmanga enkawl na an hnawl nia sawi a ni a, an fapa chu a thi ta hlauh mai si a. He thu hi hriain naupang dikna leh chanvo humhalhna dan hmangin sawrkar thuneituten thubuai an awrhtir a. Tum reng vang ni lova mihring tihlum leh naupang nunna atan hlauhawm tur thil ti-ah puh an ni.

An thubuai siam pakhat zawkah hian thiam loh an chan chuan kum nga aṭanga kum 10 chhung lung ina tân theih a ni a, pakhat danga thiam loh an

chan bawk chuan kum thum leh a chanve aṭanga kum nga lung ina tân theihna a ni thung.

Thubuai ngaihtuah a nih laiin Herbet-a te ukil chuan rinna avang ni lovin an fapa chu hritlang na deuh chauhva an ngaih avanga damdawia enkawl lo mai an nih zawk thu a sawi a, thubuai siamsaktu lam chuan, Setana nena inbei leh a tawpah Setanan hnehna chang ta zawk anga Herbert-a thu sawi an sawi chhuak thung. Herbert-a te chhungkua hi First Century Gospel Kohhran mi an ni a, he Kohhran hian natna leh thil ṭha lo reng reng chu Pathian aṭanga chhuak ni lovin Setana hnathawhnaah an ngai a ni.

– CHRISTIAN POST

Israel-in Iran a beih chuan nuclear indona chhuak mai thei

Internet thiam thil hmanga thuruk hai chhuaktute aṭanga thu put ru ‘Wiki leaks’ tia hriat larin a puan dan chuan, Isarel-in Iran a beih phawt chuan Middle East-a remna tichhe vek thei a nih bakah nuclear ralthuam (bomb) hmanga indona pawh thleng mai thei reng a nih thu Australian mi

thiam (intelligence)-te thil chhui aṭangin a lang, tih a ni.

Australia chanchinbu, 'The Age'-in a tarlan dan chuan Australian Intelligence pawl chuan Iran-in nuclear ralthuam nei tura hma a lakna chuan indona a hring chhuak dawn a, USA pawh a inrawlh ngei a rinawm avangin Australia pawh a ralbang thei bik kherin a rinawm loh va ni, tiin kum 2008 July thlaa khatih laia Prime Minister Kevin Rudd-a khan Israel hian inbiakna aṭanga remna zawn thlauhthlain, Iran nuclear ralthuam neih tumna hi tharum hmanga nuai reh a tum mai ang tih a hlau hle a, chu chuan a tihlauthawng tak meuh ṭhin a ni, tih thu a tarlang.

- THE JERUSALEM POST

England-ah Kristianna thil khap ṭul ti lo an tam

United Kingdom-a mipui ngaih dan la khawmtuten an tarlan dan chuan Kristiante chu an hnathawhna hmunah an rinna kaihhnawih thil an tih leh an inbel kawngah anmahni ruaituten zalenna an pe tur a ni tih ngaih dan nei an tam hle a, za zela 72 lai an tling.

Ngaih dan thawhtu zinga za zela 73 chuan hnathawhna hmuna Kristian nih chhinchhiahna kraws awrh ang chite hi danah phal a ni thu tarlan hial ṭha an ti a, za zela 83 chuan damdawi lama thawkten damlote nena ṭawngṭaina an hman avanga harsatna siamsak an ni ṭhin chu ṭha an ti lo.

Mipui ngaih dan lak khawm hian politician leh office hotu lamin Kristiante rinna tihlan ngaimawh zawnga thil an tih leh thu an sawi ṭhin chu mipui tam zawk duh dan a nih lohzia a tilang chiang hlea ngaih a ni. England-ah hian Kristianten an rinna an tihlan ṭhin avangin harsatna an tawh fo va, zirtirtu, sikula zirlai (sutdent) damlo ṭawngṭaisak avanga ban tak te, nurse ṭhenkhat, damlote nena an ṭawngṭai avanga hrem tawh te an awm ṭhin a, hetiang dan lek kawh hi mipui tam zawk chuan ṭul an ti lo tih a lantir a, mipui ngaih dan lo angin court-in thubuai a rem a, dan an hrilhfiah tih a kawh bawh niah Kristiante thlavang hauhtu pawl chuan a ngai.

- CHRISTIAN TODAY

Scottish Parliament-in mahni intihlum tura inpuih theihna dan siam rawtna an hnawl

“Kum 16 chung lam, tihdam hleih theih lohva ngaih natna veiin dam zui zel chu a tan phurrit lutuk tur nia ngaia a nunna tihtawp mai a duh chuan a nunna tihtawp a dil thei ang,” tia dan siam rawtna, Scotland Parliament-a put luh chuan ngaihven a hlawh hle a, a chhan chu he dan siam hi remtih a nih chuan United Kingdom chhunga hetiang dan awm hmasa ber tur a nih dawn vang a ni.

Scottist Parliament chuan he thu-ah hian Political Party rilru dah thaa an ngaih dan dik taka vote mai turin member-te a sawm a, vote lak a nih takah chuan a duh lam 16 an awm a, duh lo 85 lai an nih avangin an hnawl Chiang hle.

Intihlum aia inenkawl tha ti pawl hrulaitu Gordon Macdonald-a chuan mahni intihlum phalna dan hi siam a nih chuan mipui himna a derthawng sawt dawn a ni tiin Parliament-a hnawl a ni ta hian chhuan lo la awm tur eng emaw zat chhung chu mahni

intihlum sawimawitute an chet zui theih loh a rin thu a sawi a, natna khirkhkan veite tan hnehna lawmawn a nihzia uar takin a sawi.


– CHRISTIAN TODAY

Pakistan ram Dan sakei a hrâng - Nu pakhatin khaihlum a nghak!

Pakistan ramin Islam-ho Pathian (Allah) emaw an sakhaw lehkhabu Quran emaw sawichhiate hremna Dan khauh tak a siam, Dan sakei an tih mai, ‘Sharia Law’ an hman tan ațanga he Dan bawhchhiat avanga hmeichhe hrem hmasak ber tur Asia Bibi chuan Lung in chhungah amah khaihlum ni a nghak mek.

Hmeichhiain khaihlum hial a tawh dawn tak avang hian Evangelical Professor Throckmorton-a chuan Pakistan sawrkar chu Sharia Law tidanglam tur leh Asia Bibi chhuah tura ngenna a thlen a, a ngenna thlawp tura sawmna pawh Internet website, Change.org-ah December 15 khan a tichhuak bawk a. Ni khat chhungin mi 300 chuanguin dilpuiinaah an hming an ziak.

– CHRISTIAN POST



**B. Lalruatkima, Ramthar
Veng Zawhna**

Z. *Synod Newsletter September 2010 chhuakah khan PBS aṅanga C.Th pass tharte Certificate hlan inkhawm leh zir chhuak tawhte B.Th. B.D. zir zawm ṭhahnem tak an awm tawh thu ka lo chhiar a, C.Th zir tur hian eng nge Edn. Qualification ni a, engtin nge B.Th., B.D. zir zawm theih dan khawngaihin min lo hrilh la ka lawm hle ang?*

Ch. Certificate in Theology (C.Th) zir tur hian Pawl sarih (C1-VII) pass chin tan dil theih a ni a. C.Th. zir zo tawh zingah hian Pawl sawmpahnih (10+2) pass tawh te, Bachelor of Arts (B.A) pass te pawh an awm nual ṭhin. Chung ho zinga mi thenkhat chuan C.Th an zir zawh hnuah B.Th. te, B.D. te an thiamnain a phâk sa bawk avangin zir leh an awm a, chung ho chungchang sawina chu a ni a, C.Th. zir zo hrim hrim tan B.Th/ B.D zir zawm theih tihna a ni lo.

**H. Neikhiamlova, Champhai
Vengthlang Zawhnate**

Z. *1. Bible chhut hluiah Sam 119:109-na ‘Ka nunna hi ka kutah a awm fo ṭhin a,’ tih a ni a. Chhut tharah chuan, ‘Ka nunna hi i kutah a awm fo ṭhin a,’ tih a ni thung a, a kar hi a hla riau mai a, a eng hi nge dik zawk?*

Ch. ‘Ka kutah’ (Sam 119:109) tih hi Hebrai Bible sawi dan a ni a. ‘I kutah’ tih hi Grik Bible, Septuagint (LXX) dah dan a ni. Grik Bible hi Hebrai Bible aṅanga lehlin a ni a. Hebrai Bible lehlin dan ‘ka kutah’ tih hi Saptawng Bible lehlin dan tam ber pawh a ni. A thu awmzia aṅang chuan Grik Bible lehlin dan ‘i kutah’ tih pawh hi âwm ve tak chu a ni.

2. Mat. 27:44 leh Mk. 15:32 thua Lal Isua an khenbeh ruala mi sual an khenbeh vete thu sawi leh Luka 23:39-42, thua Lal Isua an khenbeh ruala mi sual an khenbehte thusawi hi a va inpersan ve, a eng zawk hi nge dik a, pawm zawk tur?

Ch. ‘Unau thawnthu sawi pawh a dang’ tih angin, Chanchin Ṭha bu ziaktute ziak danah pawh hian inang lo hret hret chu a awm ngei a. Lal Isua ruala mi sual an

khenbeh vete thu sawi pawh hi i sawi ang hian a inang lem lo. A eng hi nge dik a, a eng hi nge dik lo tih hriat theih a ni lo. Chuvangin pakhat pawm a, a dang hnawl ai chuan a pahnih hian pawm mai ila, kan tisual lo zawkin a rinawm.

***Upa F. Chalthanga,
Chhiahtlang Zawhnate***

Z. *1. Roreltute dik lohna sawi a, mi rethei an rapbet a, an chanvo pawh an laksak tih a, mi rethei, a tihte kha engtia khawsa chin nge ni ang?*

Ch. ‘Mi rethei’ tih hi engtia khawsa chin nge tih hriat leh sawi thiam a harsa hle a; tunlaiin India sawrkarin tehna a siam ta hlauh zawk a. Engtia khawsa chin nge? tih hi ‘Below Poverty Line (BPL) chin sawinaah ngai ila a sual tam em lovang chu maw.

2. Zirlai 16-na sawiho tur tihah khan, kan rama roreltute hian mi rethei an ngaihsak tâwkin kan hria em, tih kha kan ramah hian eng chin hi nge mi retheiah kan ngaih?

Ch. India ramin mi rethei a tih chu Below Poverty Line (BPL) chin a ni ber a. India rama awm kan nih avangin Mizoram pawhin hei hi a ngaih dan tur ni âwm tak a ni.

3. *Zawlneite khan Israel-te hrem an nih tur an sawi tam hle a; zawlneite sawi ang khan hrem an ni ta em? Hrem ni ta lo se zawlnei thu sawi kha a dik lo kan ti thei ang em?*

Ch. Hrem ni e. Israel-te kha Assyria sawrkarin a rûn a, salah mi tam tak a hruai a; chutiang bawkin Juda hote pawh Babylon sawrkarin a rûn fo va, mi tam tak salah a hruai baw.

4. *Zawlneiten Israel-te tun din lehna tur pawh an sawi nasa a; zawlnei sawi anga Israel-te tundin lehna a awm em? Ngaih dan hrang awmte zirlaibuin min hrilh a, engtia pawm tur nge ni ang?*

Ch. Dik thei tho si, ngaih dan hrang hrang a awm chuan pawm nuam i tih ber kha pawm tawp mai la, a hahdamthlak ber ang.

***Upa Lalnunmawia, Hualtu
zawhnate***

Z. *1. Pathian Biak Inkhawm Hruaina bu chhuak thar chhut 10-na (completely Revised & Enlarged Edition)-ah hian Kohhran Inkhawma hman miah loh tur e.g. Republic Day, YMA Day, UNO Day, etc. telh a nih laiin kum tina Kohhranhote kan hman thin*

December ni 31 Zanlai Inkhawm (Kumhlui thlahna) kaihhruaina hi telh a ni lo va, Worship Committee hian t̄ul a ti lo nge hmaih palh?

Ch. Zanlai Inkhawm kaihhruaina hi Worship Committee hian a hmaih palh hlahu a ni ang. Chhut nawn leh a nih hunah chuan telh leh ngei ni se a t̄ha hle mai.

2. Sacrament Zirlaite hi kum 14-na hman mek an ni a, dan chungah lawm luh an niha Senior Dept.-a an awm tawh chuan piangthara Kohhran inkaihhruaina dan te, Sakramen chungchang te, thurinte leh Synod Office kalhmangte pawh hre hle tura ngaih an ni a. Zirlaite hian an zirlai hlutna leh pawimawhna hi an hre pha lovin an la phak chiah lo niin a lang a. Chuvang chuan Sakramen Dept. hi Senior Dept. chungah, puitling S.S.-a an luh hma hian kum 17-na hman mekte hian zir se an hlawkpui zawk lo'ng maw?

Ch. I rilru ang pua ngaihtuahna hman hi an awm nual mai. I sawi ang hian Sacrament Department hi Senior Department leh Puitling inkarah hian awm se chuan an hlawkpui

lehzual mai thei a ni. A kal zel dan tur chu Pathian leh Synod Inkhawmpui thu thuah ngai ila. Hei hi erawh chu hre tel ila: Judaten mipa tawh phawt chu an sakhaw dan uluk takin an inzirtir a, kum 13 an tlin chuan mi puitlingah ngaiin dan chungah an inlawm lut a, 'Dan Fapa' an ti a. Chutiang deuh chuan kan Kohhran pawh hian Sacrament thu leh kan Kohhran dan leh kalhmangte Sacrament Department-ah hian kum 14 an tlinin kan inzirtir a, kan lawm lut zui a; chuta chinah chuan puitlingah kan chhiar zui ve ta t̄hin a ni.

Joseph, Ramhlun Venglai zawhnate

Z. 1. Kan thawh lawmah hian Synod hian thla khata missionary pakhat chawmna hi Rs. 1000 ang hian a chhut a, hei hi a ni chiah em? Kohhran leh mi mal pawh, hemi chhutna hmanga thawh lawm thawh hi kan ni bawk a, Synod chhut dana Rs. 1000 zela pakhat chawm ang hian tun dinhmuna missionary eng zat nge chawm ang kan nih?

Ch. Cheng 1000 zela missionary pakhat chawm anga chhutin tun dinhmuna chawm zat chu 8350

a ni e.

2. *Kan Synod hian missionary a lu nungin eng zat chiah nge tun dinhmunah hian kan neih? Pakhat chawmna hi a chawhrualin Rs. 1000 lek hi em ni? Ni lo ta se, engati nge Synod hian hre reng chung Kohhran mipuite hnenah thawhlawm khawwna hmanrua atan maia thil belhchian dawl lo tak kan tih luih? He thil dik lo lian tak hi siamthat tumna a awm em?*

Ch. Synod hian tun (1.12.2010) dinhmuna missionary kan neih zat chu 1758 a ni. Missionary chawmna zat hi chawhrualin Rs. 1000 a ni lo va, Synod hian chawhrual tumna pawh a nei hran lo a ni mai thei e. Synod-in thawktu pakhat chawmna atan Rs. 1000 ni se tia a rel hian thawhlawm khawwna mai atana rel a ni lo va, missionary chawmtu Kohhrante pawhin chutiingin an ngai hran lo. Kohhran, chhungkua, thian zaho leh mi mal thlengin ramthim/ramthar rawngbawlna kan vei nasa si a, chu chu hriain Synod Mission Board leh Synod Inkhawmpui ngei pawhin missionary kan chawm ve theih dan kawng min dappui a, hetiang hian a rel a, a

rate pawh a siam ta a ni. Kum 1986, 1989, 1994 leh 1999-ah te thawktu chawm chungchang hi Synod-in a lo ngaihtuah tawh thian a; chawmna rate hman mek Rs. 1000 pawh hi la tha zel rihin a ngai.

F. Chhannawla, Lawngtlai zawhna

Z. Thuhriltu pakhat chuan thurin 5-na mihring chu mahni duh thua suala tlu lut tih laia kha bumtu vang a ni e. Thlemtuin a bum vang a ni ti lamin a sawi a. A tawpah Chairman (Pastor)-in “Thu tha tak tak kan ngaihtla a, a lawmawm hle mai”, tiin a rawn fak bawk a. Mihring hi sual (thlemtu)-in a bum vanga suala tlu lutah kan pawm mai dawn tihna a ni mai em? Pawm mai kha a him lohna a awm em? Mahni pawm rem zawng zawngin thurin kha kalpui leh sawi a rem em?

Ch. Mihringte suala an tluk chhan chu anmahni duh thu ngeia Pathian dan an bawhchhiat vang a ni (Thurin No. V). An duhthlanna zalen an hman dik loh vanga suala tlu an ni. Thlemtu (bumtu) chuan a thlem ngei a; mahse, Evi leh Adama te pawh kha a chhia leh a tha hriatna thing rah kha bumtu (Setana/rul) khan

a lawhsak lo va, an kaah a barh lo va, a lemtir avanga lem an ni hek lo, anmahni duh thu ngeia lova, eia, lem an ni. Pathian thu hi mahni rilremzâwnga pawm emaw, sawi emaw tur a ni lo va, Bible-in a sawi dan te, Thurinin a sawi dante leh Kohhranin a zirtir dante inen fiah nan hman thin tur a ni. mahni rilrem zawnga Thurin hi kalpui tur a ni lo va, Thurinin min hruai a tumna kawngpuiah kala zawh zawk tur a ni.

***P.C. Liansawia, Sialsir
zawhnate***

Z. 1. Kristian Hlabu kan hman lai thuhmahruaiah No. II-naah hian 'Phek vei lam chung number hnuai a hming hi a phuaktu, a ding lam hi a thluk siamtu' tih a ni a. Heng hlate hi phek vei lamah Mizo hming a chuang a, ding lamah hnam dang hming leh lehkhabu a ni si a. Mizo phuah, hnam dangin a thluk an siam a ni ang ti dawn ila, kum ziak hi a innil leh si lo va. Heng hi tihsual palh nge, hetiangah dah a nih chhan hi eng nge ni? KHB No. 30, 86, 92, 98, 101, 141, 192, 204, 209, 242, 273, 289, 328, 333, 459, 481, 553, 562, 573, 580, 581, 592 te hi.

Ch. Mizo hla phuaktu - heng i rawn tarlante hian Sap-ho hla

phuah thluk awm sa an ring hlawm a nih hi.

2. Hrilhfiahna bu, etc. ah hian lehkhabu rawnah te hian e.f. Rev. H. Remthanga tih mai awm, Remthanga H., Rev. han tih hi eng nge a chhan le?

Ch. Lehkhabu ziaktuten lehkhabu an ziaka an lehkhabu rawnte leh a ziaktute hming ziak dan tur kaihhruaina a awm a. Chu chu lehkhabu changkang (standard) deuh leh Hrilhfiahna bu ziaktute pawh hian an zawm thui hle a. Chu chu kan Kohhran mi hrilhfiahna bu ziaktute pawh hian an zawm tlangpui thin. Chu chu a chhan a ni ber a. Mizo rilruah chuan i rawn sawi anga hriat awlsamzawnga dah mai pawh hi thil tih dan awm tak chu a ni khawp mai.

***Upa Lalvensanga Varte,
Meidum zawhnate***

Z. 1. Kan Kohhran hmel lanna ber Synod Choir-in 'Pathian Hmel' tih Album an siamah hian an va zai duhdah ve, nui pah leh uan pahin an zai a ni berin a hriat theih a, enpuitu kan awm lo em ni? anni chinah hi chuan Biak Ina zai lai bak chu release tawh lo thin se a tha lawm ni?

Ch. Synod Choir hian 'Pathian

Hmel' tih album-a an hla sakah hian Pathian hmel sak laia ngui bur ai chuan hlim hmel pua sak chu awm leh mawi zawkin an ngai a ni ang. Anni chuan tihduhdah leh uang-ah an inngai lo. Amaherawhchu fimkhur ngaihna tur a awm a ni tih erawh chu hria se a tha ang e.

2. II Samuela 24:1-ah hian Davidan Israel mite leh Juda mite a chhiar a. Hei vang hian Pathian hi eng vanga thinur nge ni ang le?

Ch. Bible-ah hian Lal Davidan Israel mite leh Juda mite a chhiar hian eng nge a سوالنا chhan Chiang taka sawi lanna a awm lo. Davidan chhiarpui neih a duhna chhanah rin dan hrang hrang a awm thei awm e. A duhna chhan ber Bible-in a sawi chu - sipai tang thei mi eng zat nge a neih hriat nan a ni (II Samu. 24:9). Hetianga hriat a duhna chhan hi a chapo vang leh Pathian aia sipai chaknaa a inngah vang a ni thei. Chu chu a nih chuan chu tak chu a سوالنا,

a laka Pathian thinur chhan tak chu a ni ang (cf. Sam 20:7).

3. Israel hote an mangan hian Pathian an be leh mai thin a, hmai chhana inbia an ang viau thin leh nghal a. Engtiangin nge Pathian an biak thin?

Ch. Pathian hi van sang taka awma, biak pawh mai mai phak loh, mihringte aia sang tak nia ngaihna (transcendental God) leh mihringte hnena awma, anmahni pawl thin anga ngaihna (immanent God) a awm a. Chutih lai chuan Pathian chu mitin an hmu chuang lo. Chuvangin hmai chhan maia bia anga a lan pawh hian Pathian chu tawngtaian an be tho mai.

4. Sunday School zirlai khaihawm hian zirlaiin a sawi chiah pawh ni lo, kan zir chhuah ngei tura thil awm si sawi leh ngaih dan zeh tel chiam hi a pawl em?

Ch. Pawl lo ve; pen thui lutukna lakah erawh inven deuh a tul thei e.

“Dawhthei lo mi i nih chuan Joba nun en rawh. Hruaitu tha nia i inhriat chuan Mosia nun en la. Tawngtaia thingthit harsa i tih chuan Elija en rawh. Hla sak harsa i tih chuan Davida Hla chhiar la, thil ruahman mi i nih chuan Daniala en rawh. I rinna a chak lohvin Paula en la, i thatchhiat changin Jakoba en rawh. I hma hun i thlir duh chuan Thupuan chhiar rawh.” – *Charles E. Fuller*

Sermon**DAM CHHUNG NI CHHIAR DAN**

– Rev. Vanlalzuata

“Kan dam chung nite chhiar dan min zirtir ang che, Finna thinlung kan put phah hialna turin” (Sam 90:12).

Pathian thu kan tarlan hi Mosia ʔawngʔaina thu a ni a, a mawi ngawt mai. Mosia hian Pathian hnenah dam reina a dil lo va, thiamna leh finna a dil lo va, sum leh pai a dil hek lo. Dam chung ni chhiar thiam dan a dil a, a dam rei emaw, dam rei lo emaw, dam dan a dil a ni ber mai. He thu hi kumthar thuchahah pawh sawi hlawh tak mai a ni a, heti hian zir nawn leh ila.

1. Dam chung ni chhiar thiam a ʔul : Mi tin hian dam hlutzia chu kan zir thiam ʔeuh mai a, thih hrehawmzia pawh kan zir thiam vek hlawm a. Amaherawhchu, dam laia awm dan leh thih dawna awm dan kan thiam lo ʔhin. Nula pakhat thi mai tur chuan a nu hnenah, “Ka nu, lehkha min zirtir a, inchei nalh dan min zirtir a, sum hmuh dan min zirtir thiam bawk a, amaherawhchu thih dan min zirtir loh avangin chatuan thlengin a pawi dawn ta a nih hi,” a ti a, nula vanduai tak a ni. Tunlai khawvelah hian he nula ang hi mi tam tak kan awm. Hausak dan chu kan thiam sawt hle a, amaherawhchu dam chung ni chhiar dan kan zir peih loh avangin dam dan leh thih dan kan thiam lo ʔhin a ni.

Kan dam chung nite hi a rei si lo va, chatuan erawh chu a ral ve dawn si lo va. Chuvangin chatuan atan kan dam chung tawi tē hi chhiar dik a ʔul a ni.

2. Dam chung nite chhiar dan : Dam rei hi kan mamawh ber a ni lo va, kan dam chung nite hi a hman ral dan dik kan mamawh ber ang. Hei hi kan thupui ber a nih avangin kawng hrang hrangin thlir zau ila:

1) Hun hlutna hriat: Hun hi roreltu dik ber a ni a, a hmang thiam tan chuan *second* tinin a ngilneihna a lantir a, thil thar a rawn thlen ʔhin a. A hmang thiam lote tan erawh chuan hun hi a tlai zung zung mai a, dem a hlawh a, ngilneihna reng reng a nei lo. A hmang thiam lotu chu lal ber pawh ni se, *second* khat

lek pawh a nghâk ngai lo va, a pek belh ngai bawh hek lo va, a tlansan mai thin a. A hmang thiamtute tan erawh chuan hun hi a dawhthei a, amah ngainatute chu duhsak takin a awm tlei thin.

Pathianin hun hi a chena chen atan min pe lo va, hman tangkai atan min pe zawk a. Sana buntu chuan a sana her dan milin a nun chu a herh dik a, a nun milin a sana chu a duh duhin a herh ngai lo va. A sana a en a, kal hun te, hawn hunte a hria a, awmze nei takin a nung thin a. A nun duh dan milin a sana herh sela chuan a nun a buai dawn a. Chutiang bawh chuan hun hi kan sana a ni a, hun milin kan nung ang a, chu chu dam chhung ni chhiar dan dik a ni ang.

Kan dam chhung hun hi thlir theuh ila. Nausên an thi a, thalai an thi a, tar thlenga dam chu khaw khatah hian kan khât pharh mai a nih hi. Chuvangin thi thut thei dinhmunah kan ding vek a ni tih hi kan sana (hun) kan en chuan kan hre thei ang. Joba pawh khan, “Ka hunte hi zualko tlan aiin a chak a ni,” a ti a (Job. 9:25). Chutiang chuan dam reng tur emaw kan intih lai hian thihna chu a lo thleng phut

phut thin. Mitthi vuinaah kan kal chuan a hun taka thi rêng rêng hi kan awm lo va, “A la hun lo asin mawle,” tih hi kan tah hla a ni tih kan hre theuh mai. Thi mai tur anga inngai lote kan thi thut thut hi khawvel tihrehawmtu pakhat a ni. A hun taka kan thih theih nan hun hi kan hmang tha tur a ni. Hun hlutzia hretute chu kum za dam tur angin hna an thawk a, naktuka thi tur angin an tawngtai tur a ni.

2) *Hun aiin a hmangtu nun:*

Hun bi hnuaia chengte tan chuan hun bi mila nun thiam hi a pawimawh tak zet a ni. Eng hun pawha thi thut thei kan nihzia hre chung a kan sual viau theite hi Setana thilmak tih a ni ngei ang. Mi pakhat hi a rethei hle a, kawr hak tur pawh a nei lo va, duhsaktu pakhat hian kawr tha tak mai a pe a. Ani chuan rang takin a la a, nimahsela ha lovin a pawt thler a, êk hrûk nan a hmang ta mai a. A petu tan chuan a thinrim thlâk viau ang. Chutiang bawh chuan Pathianin kan mamawhzia hriain hun hlu tak min pe a. Keini erawh chuan hun thar kan neihte hi sual rawngbawl nan kan hmang thin a, min petu Pathian duh loh

zâwng tih nan kan hmanġ thin a ni. Chuti chung pawhin Pathianin hun hlu tak min la pe fo hi a mak hle a ni.

Sap thufing pakhatin ‘Hun hi pawisa a ni’ a tih hi a dik khawp mai. Hun hlutzia hretu apiangten hun hi an hmanġ thiam a. Wawi khat chu Japan ramah khian Public Meeting pawimawh tak a awm a. An khuallian chu minit nga-in a rawn kal tlai a. Mipui chu an thin a rim hle mai a, a then chu an hawng leh hial a ni, an ti a. A chhan chu, minit nga chhũnga an hun khawh ral chu hnathawh nan hmanġ ta se, sum lak luh nana hman tur a ni dawn tih an hria a, an ui a ni.

Mosia țawngțaina hla chuan Pathian hnenah, “Kan dam chhung nite hi i thinrimnaah a ral thin,” a ti a. Engtin nge kan dam chhung nite hi Pathian thinrimnaah a ral thin? Heti hian sawi zau deuh ila: Chatuan reizia kan ngaihtuah chuan kan dam chhung nite hi chhum rei lo tē lo lang, ral leh ta mai ang hi a ni a. Kan dam rei loh teh rēng nen, kan dam chhung hun tawi tē hi suahsualna hun atana kan hman chuan Pathian thin tirim tâwk chauhvīn kan dam tihna a ni ang. Juda Iskariot-a

kha a dam rei lo hle a, a hun tawite chu a Lalpa hralh nan a hmanġ ta mai a. A chungchang thu sawiin Lal Isua chuan, “Chu mihring chu piang lo sela, a tan a țha zawk ang,” a ti hial a ni. A dam chhung nite chu Pathian thinrimnaah a ral ta a nih chu!

Kan dam chhung nite hi han chhũt vang vang ila, sual rawngbawl nan chuan a uihawm lutuk a ni tih kan hria ang. Zu ruih nan te, rŭk rŭk nan te, Pathian hriat loh nan, kan dam chhung nite hi a tawi lutuk a ni. Tlangval pakhat pawh a thi dâwn a, a hun kal liam tawhte a thlir kir a, sual rawngbawl nana hun a lo hmanġ țhinte chu a inchhir ngawih ngawih a. Martin Luther-a chuan chu tlangval tan chuan “*Ka chhandamtu chu tâwk turin*’ tih hla hi a phuah a ni, an ti.

3) *Tun hun pawimawhna:* Hun hi chi thumin a thliar theih a – ‘tun hma’, ‘tun’, ‘nakin’ tiin. Hun chi thumte zinga hman țat țul ber chu ‘tun’ hi a ni. Thufing pakhat chuan, “Thingzara sava pahnih aiin kuta sava pakhat a hlu zawk,” a ti a. Thingzara sava chu kan thununna hnuaiah an awm lo va, kan kuta sava erawh chu kan kuta awm, kan duh

duha kan tih theih a nih avangin a hlu bik a ni. Chu chu ‘tun’ hun hlutzia sawina a ni a. Tun hma leh nakin hun chu kan thununna hnuai a an awm lo va, thingzara sava ang an ni a. Tun hun erawh chu kan kuta awm, kan hman tura Pathian min pek a ni a, kuta sava ang chu a ni. Kan duh chuan thil sual tih nan kan hmang thei a, thil tha tih nan kan hmang thei bawh.

Tun hun kan hman dan hian tun hma leh nakin a nghawng ve ve thin. Tun hi kan hman liam dan ang angin tun hma a chan hun a thleng thuai dawn a. Chutiang bawh chuan tun kan hman dan hian nakina kan awm dan tur a hril bawh dawn a ni. Chuvangin tun hun hi kan hman that loh chuan nimin leh naktuk a hman that theih loh a ni. Mi pakhat pawhin, “Hun kal tate khan min lo bum a, chuvangin tun hunah hian ka lungngai ta a, hun lo la kal tur ka huphurh tak zet a ni,” a ti ngui raih mai a ni. He pa hian tun a hman that duh loh avangin a dam chhung nun chu a chhiar thiam ta lo a ni. A nihna takah chuan hun kal tate khan a bum awzawng lo va, amah zawkin bum a tum a, amah leh amah a inbum ta zawk a ni.

Mi thatchhe tak pakhat pawh hi a lovah a feh a. A thlâm atangin, “Khulai khu naktukah ka thlo vang a, a tuk lehah sawlai saw ka thlo leh ang a, a tók lehah khilai khi ka thlo vang a... E, vawiina thlawh tur a awm lo a nih hi,” tiin a hawng daih mai thin a. Kum a lo tawp chuan buh seng tur a nei ve ta lo a ni. He pa ang hian tun hun hmang tha peih lote chu kan nung thin a ni. Thil tha tih hi kan duh lo bik pawh a ni lo va, nakina tihah kan khêk a, tunah kan awm mai mai a. “Nakinah ka la piangthar ve ang,” kan tih laiin thihna kut vawtin min nang thut thin a ni.

Nakin hi Setana ta a ni a, tun hi Pathian ta a ni. Kan Pathian hian tun hma leh tun hnu a nei ve hauh lo va tun chauh a nei, “Tun hma tun hnu keinin kan ti, nangin tun i ti fo,” tiin hla kan sa thin a nih kha. Kan Bible pawh hian, “Tun hi hun lawmawm a ni a, tun hi chhandamna ni a ni,” tiin min hrilh a (II Kor. 6:2), nimin leh naktuk chu chhandamna ni-ah a sawi ngai lo. Chuvangin, “Nakin lamah ka la ti ve tak tak ang chu,” tia mahni inhnem lungawi tum apiangte hi kan che sual zel dawn a ni. Mi

ṭhenkhatte chuan hmana Pathian thu an awihzia leh kohhran tana an thawh nasatzia tui takin an sawi a. “A nih leh tunah eng nge i an?” tiin han zawt ila, “Ka da der tawh,” an ti mai ṭhin. Hmana ṭangkai emaw, nakina ṭangkai tum emaw aiin tuna ṭangkai nih hi a hlu ber a ni. Tun hi nimina a chan hma ngeiin hmang ṭha ila, chutichuan dam chhung ni kan chhiar dik thei ang.

A tawp berah chuan hetiang hian a tlâng zial ila. Mosia ṭawngṭaina hian kan dam chhung nun hi thawnthu phuah angin a tehkhin a. Thawnthu ṭha reng reng chu a bul aṭangin a ngaihnamw tial tial a, a chhiartuin ngaihnamw ti takin a chhiar chhuak ṭhin. Thawnthu ṭha lo erawh chu a bul lam ngaihnamw hmel viau mah se, a ngaihnamw lo tial tial a, miten an chhiar ning mai ṭhin. Chutichuan, kan nun hi thawnthu ṭha angin a

ngaihnamw tial tial tur a ni ang. Nikum aiin kuminah ngaihnamw zual ila, nimin aiin waviinah ngaihnamw tum tlat ila, waviin aiin naktukah kan ngaihnamw leh sauh tur a ni. Chu chu dam chhung ni chhiar dan dik a ni ngei ang. Mi ṭhenkhat chu a tirah kan ngaihnamw hmel fu a; nimahsela miten min han belh chian tak tak hian, “Ka rin ang a lo ni hauh lo mai,” tiin min chhiar ning zui leh mai ṭhin.

Mitthi ruang chung a ngaihnamw ber hi eng nge ni? An hausakna te, an hmel ṭhatna te, an finna leh thiamnate a ngaihnamw phâk tawh hauh lo asin. Awmzia an nei tawh hek lo. An thih lai mêka an awm danah Lal Isua nen an inhmu Chiang bal em? Hlim takin kan beisei Van Jerusalem an pan em? tih hi a ngaihnamw lai ber chu a ni. Chumi hunah chuan kan thawnthu phuah chu a tawp ang a, chatuan a ni vung vung tawh ang.

“Tun hun ngaihthahtu chuan a neih zawng zawng a khawh ral a ni.” – Schiller

“Chatuan ngaihtuah tel loh chuan hun hman ṭhat theih a ni lo.” – Carlyle

SYNOD INKHAWMPUI THLIRLETNA

Mizoram Presbyterian Kohhran rorelna Inkhawmpui neih zinga thu neitu sang ber, Synod Inkhawmpui chu December ni 7 - 12, 2010 chhung khan Dawrpui Pastor Bialin Zarkawt Kohhran Biak Inah hneh takin an thleng a; rorel palai zawng zawng hi, ram pawn ațanga Synod dang unaute leh mi sawm bikte nen an vaiin 1800 an ni. 2009 Synod aiin 28 chauhvin an tam. Kum hmasa lama Synod thurel zuiin kumin 2010 ațang hian Synod Inkhawmpui hi Kohhran malin thleng lovin Bialin an thleng ƚan a, inkhawmpui thlenna tura thil ƚul leh pawimawh titu tur inruatnaah pawh Bial huap zela inruatin sum leh paiah pawh Bial Kohhrante an ƚang tlang a, mikhual pawh Bial chhung Kohhran hrang hrangah sem darh an ni.

1. Synod Puipate leh rorel hmahruai: Synod wawi 87-na Puipate chu heng mite hi an ni:-

| | | |
|-------------------------|---|--|
| Moderator | : | Rev. C. Lalsangliana |
| Secretaries | : | Upa Vanlalthuma (Sr.) Rev. P.C. Pachhunga (Jr.) |
| Finance Officers | : | Rev. Zosangliana Colney Rev. Dr. Lalhmangaiha |
| Statistician | : | Upa J.H. Ramnghinglova |
| Sr. Executive Secretary | : | Rev. Vanlalzuata |
| Executive Secretary | : | Rev. Lalzuithanga |

Inkhawmpui palaite rorel hun chhung hi December 8 - 11 (ni li chhung) a ni a, hemi hma lam ni sarih chhung hian Inkhawmpui Committee pawimawh hrang hrang - SEC, Pastoral leh Nomination Committee te an lo ƚu lawk vek a, heng Committee-te hian Synod-a rel/pawm turin thil chi hrang hrang eng emaw zatah

ruahmanna an lo duang hmasa vek a ni.

Nikum 2009 Synod Inkhawmpuiin hun hman dan tura a lo ruahman zuiin kumin Synod Inkhawmpui hi tluang taka neih a ni a, thu sawitu tura ruatten an hun an hman thei vek a ni.

2. Pastor tawh chêt, etc:
Pastor-te rawngbawlna

chungchanga thu neihna tawp neitu a nih angin Synod chuan Pastor atan mi 20 a nemnghet thar a, heng mite hi Probationary Pastor kum thum lo thawk tawhte an ni. Pathian thu zir chhuak 83-in Probationary Pastor (hna) an dil a, hemi atan hian Synod-in sum leh pai leh Kohhran dinhmun hrang hrang enin lak tur zat a bithliah thin a, diltu 83 atang hian Probationary Pastor atan mi 17 lak thar an ni a, an zinga 12 chu Synod Pastoral Ministry hnuaiia thawk tur an ni a, pathum hi Synod Ramthar Board hnuaiia thawk tur an ni a, pahnih chu Manipur Area chungha thawk tur an ni.

Synod-in Pastor-te thawh theih hun chhung kum a bithliah, kum 60 tling tawh, Pastor/Minister pariat chu kum thar 2011 atanga pensiona chhuak tura tih an ni a, Pastor hna thawk mek 12 chu zirna sang zawk zir phalsak an ni.

Synod-in Pastor insawn hun bi a thliah (kum nga), an awmna ngaia awm tling tawh, tulna bik avanga an awmna ngaia awm leh tura tih 13 an awm a; SEC-in an awmna tura a ruat/rel angin mi pahnih chu dinhmun pawimawh tak chelh tura dah thar an ni a, chungte

chu National Council of Churches in India (NCCI)-a General Secretary (*full time*) atana ruat, Rev. Dr. Roger Gaikwad leh Aizawl Theological College Principal atana ruat, Rev. Dr. Vanlalchhuanawma te an ni. Synod Ramthar rawngbawlina hmun hrang hranga a khaipa, Field Secretary-te awm hun chung tura tih awm tawh thenkhat an awmna sawn an ni a, an aiah mi paruk chu Field Secretary atan hian ruat thar an ni a, an hun (*term*) tawp avanga hun khat dang atana ruat nawn pahnih an awm bawk.

Anmahni awmna hmuna an awm hun chung tura danin a tih anga an hun hmang zo tawh Pastor 51 an awmna hmun sawn an ni a, Pastor 18 dang, an term zawh vang pawh ni lova an hna thawh lai atanga hna dang thawk tura an awmna hmun sawn an ni bawk a; Manipur Area-a thawk Pastor 11 an awmna sawn an ni bawk.

3. Presbytery then: Aizawl Chhim Presbytery, Pasor Bial pariat awmna chu pali ve vea awm turin then a ni a, Aizawl Chhim Presbytery atang hian Aizawl Chhimthlang Presbytery siam thar a ni a, chuta awm

turte chu Bungkawn Bial, Khatla Bial, Mission Vengthlang Bial leh Maubawk Bial te an ni. Tuivawl leh Tawi Presbytery ațangin Tuivawlrall Presbytery siam thar a ni bawk a, he Presbytery tharah hian Kawkulh Bial, Hliappui Bial leh Lungpho Bial te awm tura tih an ni. Hei bakah hian ram pawn lama Synod rawngbawl na hmun Karbi Anglong chu Presbytery neia awm tura tih an ni bawk.

4. Pastor Bial thar: Sairang leh Kawnpui Bial ațanga sawk hekin Sairang Dinthar Bial siam a ni a, Khawzawl Vengthar Bial ațangin Chawngtlai Bial siam a ni a, Vanzau Bial leh Khuangleng Bial ațanga sawk thlain Leithum Bial siam a ni a, Electric Veng Bial (Aizawl) ațangin Ramthar Veng Bial siam thar a ni bawk. Synod Ramthar rawngbawl na hmun - Arunachal West-ah Pasighat Bial ațangin Likabali Bial, Lucknow Field chhungah Lucknow South Bial leh Manipur Field-a Kumbi, Kakchingkhunou leh Mayang Bial ațangtea sawh thlak Ithai Bial siam thar a ni bawk.

5. Presbytery leh Board/ Committee ațanga thu lut (General Agenda):

Presbytery hrang hrang leh Synod hnuaiia Committee/ Board hrang hrang ațanga Synod-a thu ngaihtuah tura thlen, General Agenda 78 a awm a, thu tihtluk dan tlangpui hetiang a ni:

- 1) SEC bawhzui tura dah 20
- 2) 'Kan kal dan a tha' tih 17
- 3) Rawtna anga remtih 13
- 4) 'Kan inhrilhfiyah' tia rel 7
- 5) 'Sawihona a tawk' tih 6
- 6) PCI Gen. Assembly/EC-a thlen tura tih 4
- 7) 'Kan infuih/inchah' tih 3
- 8) 'A țul/remchang lo' tih 2
- 9) NEICC-a thlen tur 1
- 10) Presbytery tin ngaihtuah leh tura tih 1
- 11) MSSU rel fel tura pek 1
- 11) Rawtna hrula tihtluk 1
- 12) Tih dan phung pangngai zuina thu pawn 2

Synod Executive Committee (SEC) bawhzui tura tih thenkhat hi chu nakkum Synod Inkhawmpuia rawn thlen leh tura tih a ni a, SEC bawhzui tura thu dah hi tih thin dan tlangpui a ni a, Synod Inkhawmpuia hian chipchiara thil rel fel hman tak tak a nih loh avangin SEC-

in a bawhzui thin tlangpui a, SEC pawimawhzia pawh a lang nghal awm e.

6. Thu rel pawimawh deuhthe:

a) Rawtna lut anga rel thlukte chu hengte hi a ni:

- 1) Kohhran lehkhaw pawimawh hrang hrang siam sate ram pumah uluk zawk leh rual zawka hman (Gen. 23).
- 2) ATC zirlai, Practical Work neia Presbytery Inkhawmpuia chhimtu palai tirh thin hi kan Thurin min pawmpui thei lotu chu tirh tawh loh (Gen. 48).
- 3) Synod Inkhawmpuia a tam thei ang Mizo tawng hman (Gen. 53).
- 4) Pastor Bial thar hawn dawnin Bial hawn ni atanga Bial vawng thei ngei tur chauh Pastor dah thin (Gen. 56).
- 5) Sunday School Zirlai Bu, Nilai leh Beihruai Thupui, etc. te Zoram pawn boruak huap zo deuh zawka ziak thin (Gen. 58).
- 6) Innei turte kum bithliahah sawrkar thu anga 'mipa kum 21 pumhlum leh hmeichhia kum 18 pumhlum' hman (Gen. 65).

7) Pastor Quarters grant Rs. 8,00,000 atanga Rs. 10,00,000-a tihpun (Gen. 67).

8) Media-in a tha lo zawng nun a kaihhruai dan leh hemi hmachhawn dan tur rawtna in tina hriattir (Gen. 68).

9) Inkawp lo chi inkawp - mipa leh mipa, hmeichhia leh hmeichhia inkawpte thunun a, an inkawp chhung zawng thunun tur (Gen. 69).

10) Synod Inkhawmpui rorel tihzangkhai dan tur ruahmanna pawm a ni (Gen. 78).

11) Kohhran Hmeichhe Inkhawmpui Lian Golden Jubilee lawm an dil angin remtihsak an ni (Gen. 72).

12) 'Naupang Sunday School-a kai tan tur kum 4 tihchianna Inkaihhruaina Bua telh tur (Gen. 76).

13) Manipur Area-in SMB leh MSSU-a Board member nih an dil angin phalsak an ni (Gen. 78).

b) Synod Executive Committee bawhzui tura tih thu langsar deuhthe:

- 1) Secular College din chungchang (Gen. 4).

- 2) Pavalai Pawl inkaihruaina siam (Gen. 5).
- 3) Sikulpui lâk lêt thu (Gen. 33).
- 4) Biak In chhunga inchei dan tur/awm dan mawi inzirtirna siam (Gen. 39).
- 5) Synod Sum vawn dan enthat (Gen. 63).
- 6) MDTC hmun Bualpuiah tuna Mission Vengthlanga awm Missionary Training College (MTC) sawn (Gen. 64).
- 7) Zawlaidi (Grape wine) tizûtu (*alcohol*) pai tihniam tura sawrkar ngen (Gen. 66).

Rorelnaa thu tihtlukah ‘Kan kal dan pangngai a tha e’ tih 17 lai a awm a, hei hian Mizoram Presbyterian Kohhran hi tih dan leh kalphung thlak zung zung lem lo, ze nget tak nei tih a lantir a tih theih a, thu lut thenkhat, a tha tih tlan, amaherawhchu a chipchiara SEC bawhzui tura dah pawh 20 lai a awm a, hei hian hmasawn zelna lam a hawi tlangpui a, Kohhran hmasawn zel a nihzia a lantir thei baw ang.

“Kan inhrilhfiah” tih pasarih lai awm hi en chian chuan thu lut tur kan zir chian tawk lohzia a tilang tlangpui a, fimkhur tuzia a lang.

“Kan sawihona a tawk” tia rel hi chu Synod hmalakna âwma ngaih lem loh a ni tlangpui a; Presbytery Inkhawmpuia paih thlak ai chuan kal zel ve hrim hrim se, tih ang chi hi hian hetiang rel hi a hlawh duh deuh.

Pavalai Pawl Kaihruaina siam ngai taa hriatna hian Kohhrana thil thar piang a awm tih a lantir a; Biak Ina incheina chungchanga kaihruaina siam tui tihna te, Grape wine chungchang te hian Mizo hman nun inthlak mek zel (*transition*)-a kan dinzia a tilang Chiang hle baw. Zirna lama sawrkar hmalakna duh khawp lohna a la kal zel a, Kohhranin tha deuh zawka kalpui theih rinna a awm niin a a hmuh theih baw.

Synod Inkhawmpui rorel hun heh lutuk ngaih mawhna awm reng thin chuan ziaawm lam a pan dawn niin a lang a, “Rorel tihzangkhai dan tura rawtna” pawm a nih tak avangin nakkum Synod Inkhawmpui atang chuan rorel hun bi tuka zawh loh a awm tawh lovin a rinawm.

Synod vawi 87-na Moderator Rev. C. Lalsangliana leh Puipa dangte thawh hona a tha hle a, Moderator-in rorel kaihruai leh Lalpa Zanriah

Sakramen theha chet vel danah fak a hlawh hle. Kum eng emaw zat chung rorel hun bi tuka zo hman tawh lo khan an zo hman a. Hetih lai hian thil pawimawh sawi deuh ngai pawh sawina hun hawng lo lutuk leh hnûk lutuk deuhvah Moderator chu an ngai ve tho bawk.

Tangka kumthar April 2011 - March 2012 chung Synod sum hmuh leh hman tum (budget) Synod Finance Committee-in ruahmanna a siam pawm a ni a, hetiangin :

1. A pumpuia hmuh tum (Pastoral) Rs. 64,78,42,300

2. A pum puia hmuh tum (Mission) Rs.37,36,56,700


3. Hmuh/hman tum zawng zawng **Rs. 1,02,14,99,000**

Hmuh tum leh hman tum a intluka dah a ni. Mizoram Presbyterian Kohhran inchhirnaa a lan danin Mizoram Synod hnuaiiah hian Presbytery 40, Pastor Bial 251, Kohhran 1360 an awm a, Pastor (Bial nei) 250, Minister (Bial nei lo) 191, an vaiin 441 awmin, Kohhran Upa 3940 leh Pem Upa 376 an awm a, Dan chung a awm mek 3,67,019 awmin Kohhran mi zawng zawng 5,50,560 an awm mek a ni.

Nakkum, 2011 Synod Inkhawmpui chu Khatla Kohhranah Khatla Bial thlen tura nghah a ni a, Nov. 30 - Dec. 11, 2011 chung hman a ni ang. Puipa turin heng mite hi ruat an ni:

| | |
|-----------------------|---|
| Moderator | : Rev. Thangzauva |
| Secretaries | : Rev. P.C. Pachhunga (Sr.) : Upa D.P. Biakkhuma (Jr.) |
| Finance Officers | : Rev. Zosangliana Colney : Rev. Dr. Lalmangaiha |
| Statistician | : Rev. C. Sangliana |
| Executive Secretaries | : Rev. Vanlaluata : Rev. Lalzuithanga |





UPA K. LALREMA NEIHDAWN

Upa K. Lalrema (69), Pu Thangruaia leh Pi C. Chalmawii te fapa hi August 20, 1940 khan Neihdawn Zopui hmunah a piang a. February 20, 1965-ah Pi Thansangi nen an innei a, fa panga an nei.

Kum 1966-ah Tual Upaa thlan a ni a, kum 1968-ah Upaa thlan a ni leh a, hemi kum vek hian Khawchhak Presbytery Inkhawmpuiin Neihdawn Kohhran Upa atan a nemnghet a. Rawngbawlina chanvo hrang hrang a chelh zingah Synod Executive Committee (SEC) te, Tuichang Presbytery Moderator leh Bial Inkhawmpui Chairman te hi a langsar zual a ni a, Tualchhung Kohhranah chuan chanvo pawimawh hrang hrang a chelh kim deuh vek a, Sunday School Zirtirtu chawimawina Diploma a dawng tawh bawk.

Kum 2008 atangin a insawisel tan a, ril cancer a ni tih hmuh

chhuah a ni a, damdawi inah zai a ni a, in-check-up leh tuma a inbuatsaih laiin a chau telh telh a, July 11, 2009 khan Lalpa hnenah min lo chawhhsan ta a ni. Hemi ni vek hian amah thlahna, in lamah Pastor K. Lalrammawian a hmang a, Biak Inah Tuichang Presbytery Moderator Upa V. Lalparlianah a hmang leh a, Bial Upa te, Kohhran Zaipawlte leh Kohhranhoten ui takin kan thlah liam ta a ni.

*Upa K. Lalrintluanga
Neihdawn Kohhran Ziaktu*

UPA ZOSIAMA HRANGCHALKAWN



Upa Zosiama Fanai Pakhup (61), Pu Liankiaua leh Pi Vanhliri te fapa hi March 27, 1948 khan Khawzawl Darngawnah a lo piang a, Dec. 4, 1990-ah R. Lalhleii nen innein fa pathum an nei. A hna avanga hmun hrang hranga a awm hnuah kum 1992 atangin Hrangchalkawnah a thih ni thlengin a awm ta a ni.

Kum 1993-ah Kohhran Upa

atan thlan a ni a, kum 1994-ah Chhim Presbytery Inkhawmpuiin Hrangchalkawn Kohhran Upa atan a nemnghet a, Kohhranah chanvo pawimawh a chelh kim deuh vek a; Bial Secretary, Bial S.S. Secretary te pawh a ni tawh.

June 27, 2006 zan aţangin thisen s ng natnain a tlak buak a, mahnia zunram pawh thiar thei lovin a awm zui ta a, August 29, 2009 tlai lamah a natna hi zual thutin Damdawi Inah vawi hnih luhpui a ni a;  that lam pan thei tak tak lovin September 3, 2009 zing dar 12:45-ah Lalpa hnenah min lo chawlhsan ta a ni.

- *R. Vanchuanga*
Hrangchalkawn Kohhran Ziaktu

**UPA LALBIAKSANGA
BUNGKAWN VENGTHAR**



Upa Lalbiaksanga (80), Pu Thangluaia leh Pi Darneih-chhungi te fapa hi ni 14.2.1929 khan Lamchhip khuaah a lo piang a, Feb. 14, 1953-ah Lalnghakliani nen inneiin fa pasarih an nei.

Kum 1982-ah Kohhran Upa atan thlan a ni a, hemi kum vek hian Chhimpei Presbytery-in

Lamchhip Kohhran Upa atan a nemnghet a. Lamchhip Kohhranah Kohhran Chairman leh S.S. Supdt. te ni  thinin Inneihtirna License tum hnih kawltir a ni bawk.

Kum 2005-ah a fate awmna Bungkawn Vengtharah a pem a, a theih ang angin a rawngbawlna a chhonzawm a ni. Thisen sang avangin kum 2007 aţangin enkawl a ni a, ni 27.10.2009 tlai aţangin irhfiak reh thei lo a neih chu pumpui cancer a ni tih hriat zui a ni ta zel a,  that lam pan thei lovin ni 31.12.2009-ah Lalpa hnenah min lo chawlhsan ta a ni.

A tukah amah thlahna hun Bialtu Pastor Vanlalzuatan a hmang a, Kohhranhoten ui takin kan thlah liam ta a ni.

- *Upa H. Saikhuma*
Bungkawn Vengthar
Kohhran Ziaktu

**UPA K. VANLALMUANA
BUHCHANGPHAI**



Upa K. Vanlalmuana (61), Pu Vankunga leh Pi Dengsuaki te fapa hi ni 10.11.1949 khan

Sawlung khuaah a lo piang a. Ni 11.01.1975-ah Pi Lalnunthari nen an innei a, fa pariat an nei

Kum 1983-ah Tual Upaa thlan a ni a. Kum 1985-ah Kohhran Upa atan thlan a ni leh a. Hemi kum vek hian Hmarthlang Presbytery Inkhawmpuiin Buhchangphai Kohhran Upa atan a nemnghet a. Rawngbawlna chanvo hrang hrang - Kohhran Chairman, Ziaktu, Sum kawltu, S.S. Superintendent, Bial Inkhawmpui Chairman-ah te a țang tawh a. S.S. Zirtirtu Chawimawina Diploma a dawng tawh bawk. Kum 1972 ațangin Primary zirtirtuah a țang a, Headmaster niin a thih ni thlengin he hna hi a thawk a ni.

Ni 24.12.2003, Krismas urlawk nia a huan kal chu thingah a chesual a, a hnungzang ruh a sawh chhia a. Damdawin hrang hrangah enkawl a ni chungin țhat lam a pan thei chuang lo a ni. March 2010-ah zun kawng fel lo avangin Damdawi in panpui a ni a, ni 22.3.2010 khan Lalpa hnenah min lo chawlhsan ta a ni.

A tukah amah thlahna hun in lamah Pastor K. Laltlanzovan a hmang a, Biak In lamah Upa Lalnunmawia, Hmarthlang Presbytery Moderator-in a hmang leh a, Presbytery Upa te,

Bial chhung Upa leh Kohhran Zaipawlte nen ui takin kan thlah liam ta a ni.

- *Upa C. Rongenga
Buhchangphai Kohhran Ziaktu*

UPA C. KAWLBUAIA KAWLKULH



Upa C. Kawlbuaia (77), Pu Laiawrha leh Pi Pangliani fapa hi April 15, 1934 khan Kawlkulhah a piang a. Ni 24.5.1962-ah Zingpuii nen an innei a, fa pariat an nei.

Kum 1981 khan Kawlkulh Kohhran Upa atan thlan a ni a. Kum 1982-ah Hmarchhak Presbytery Inkhawmpuiin a nemnghet a. Rawngbawlna chanvo pawimawh tak tak - Chairman, Secretary, S.S. Superintendent; Bial Statistician te a ni tawh bawk.

Upa C. Kawlbuaia hi pa hrisel, chak leh thothang țha tak țhin ni mah se Asthma natnain a tlak buak ta hlauh mai a. A mit te a lo fiah lo ta bawk nen kum 2008 ațang chuan Bial pawh a vawng hlei thei ta lo va. Damdawi inah te enkawl a ni chungin ni

20.5.2010 khan chatuan ram min lo pansan ta a ni.

A tukah amah thlahna hun in lamah Upa Malsawmdawng-lianan a hmang a. Biak Inah Pastor V. Lalkiman a hmang leh a, Kohhran Zaipawl leh Bial chhúng Kohhran hrang hrang Upate leh Kohhran mipuiten ui takin kan thlah liam ta a ni.

*- Upa Lalthananga
Kawlkulh Kohhran Ziaktu*

UPA VANKHUMA RAWPUICHHIP

Upa Vankhuma (75), Pu Thanseia leh Pi Rochhingpuii te fapa hi ni 21.2.1935 khan a lo piang a. Ni 29.4.1959-ah Pi Rualchhingi nen an innei.

Kum 1980-ah Upaa thlan a ni a, hemi kum vek hian Chhimthlang Presbytery-in Rawpuichhip Kohhran Upa atan a nemnghet a. Synod Committee hrang hrang - Music, Sunday School leh Pastoral Committee-ah te awm tawhin; Presbytery-Standing Committee leh Nomination Committee-ah

member-ahte a lo tang tawh a. Bialah Chairman leh Treasurer a ni tawh bawk. Tualchhung Kohhranah chuan chanvo pawimawh hrang hrang a chelh kim deuh vek a. Sunday School chawimawina Jubili Award a dawng tawh bawk.

Kum 1995 kum tawp atangin ciatica leh thisensangin a tlak buak a, in lam leh damdawi in hrang hrangah enkawl a nih hnuin a lo tha ve leh deuh va, ni 21.5.2010 khan khawhar inah Pathian thu a sawi a, a sawi zawh hmmain nikhaw hre lovin a awm a, damdawi in panpui nghal a ni a; mahse a thluaka thisen zam chat a lo nasat tawh avangin ni 23.5.2010 khan Lalpa hnenah min lo chawlhsan ta a ni.

A tukah amah thlahna hun in lamah Bialtu Pastor Gospel Thanmawian a hmang a, Biak In lamah Tlawng Presbytery Moderator Upa Lalhmangaihan a hmang leh a, Kohhran zaipawlte nen ui takin kan thlah liam ta a ni.

*Upa Lalramzauva
Rawpuichhip Kohhran Ziaktu*



I Tlangau bu lak
aṅangin a tawp ta a, a man han pe leh thuai ang che.

Booknews

1. **Ni chhuahna lamah** : Rev. Zokima'n Pathianin a koh chhuah aṅanga Myanmar rama rawng a bawl chhoh dan zawng zawng leh Pathian hruaina a chante ngaihnawm taka a ziah hi retheite tana Pathian rin tlakzia tifiaktu a ni thei. A man Rs. 70.

2. **Khawvel hriatah Mizote** : Mizo Kristian chanchinah ziaka kan la neih loh tak mai Zaipawl History (1929-1976) chu C. Thansiam, tuna kan Kristian Hla Bu hman mek buatsaih kawnga sulsutu pawimawh tak chuan a rawn peih ta hlauh mai. Zaipawl rawngbawlna lama tui mite tan chhiar ngei chi a ni e. A man Rs. 120.

3. **Inhlanna nung** : F. Lian-chhinga'n 'Zosap din Kohhran theuh theuh kan inṅheṅhu thin hi Setana hlawhtlinna a va ni em!' tih rilru pu chung Kohhran hrang hrangte kara inpumkhatna leh thawh hona a pawimawhzia a tar lanna lehkhabu hi Zoramin kan mamawh lehkhabu-bute zinga mi a ni e. A man Rs. 100.

